

दिनांक 27.03.2024  
समय: 18.50 बजे

आकाशवाणी जयपुर-अजमेर

प्रादेशिक समाचार ।

- प्रदेश मांय लोकसभा चुनाव रा पैला दौर सारू पर्चा भरण रो काम पूरो व्हयो-हाल ताई मिली जाणकारी रे मुजब **156** पर्चा दाखिल करी ज्या ।
- भारतीय जनता पार्टी प्रदेश मांय लोकसभा चुनाव सारू 40 स्टार प्रचारकां री लिस्ट जारी कीनी ।
- नई दिल्ली मांय काल फौजी कमांडरां रो सम्मेलन सरू व्हेला ।

अर

- प्रदेश रा आतूणी हलकां मांय जोरदार तावडो- फलौदी मांय पारो 41 डिग्री सेल्सियस ने पार कीनो ।

000

राज्य मांय लोकसभा चुनाव रा पैला दौर मांय 12 सीटां माथे चुनाव सारू पर्चा दाखिल करण रो काम आज पूरो व्हे ग्यो । हाल ताई मिली जाणकारी रे मुजब ई दौर मांय **154** नामपाना दाखिल करी ज्या है । आज पहला दौर रा तैत पर्चा दाखिल करण रो आखिरी दिन व्हेवण रे कारण खास सियासी पार्टियां भारतीय जनता पार्टी अर कांग्रेस समेत न्यारी-न्यारी पार्टियां रा अर निर्दलीय उम्मीदवार नामपाना दाखिल कीना । आज नामजदगी रा पर्चा दाखिल करण वाळा कांग्रेस रा उम्मीदवारां मांय **जयपुर ऊं प्रताप सिंह खाचरियावास**, करौली-धौलपुर ऊं भजन लाल जाटव, दौसा ऊं मुरारी लाल मीणा, बीकानेर ऊं गोविन्द राम मेघवाल अर श्रीगंगानगर ऊं कुलदीप इंदौरा शामिल है । **भाजपा** री ओर ऊं अर्जुनराम मेघवाल बीकानेर ऊं, इंदु देवी जाटव करौली-धौलपुर ऊं, प्रियंका बालन श्रीगंगानगर ऊं, कन्हैया लाल मीना दौसा ऊं, भूपेन्द्र यादव अलवर ऊं, **जयपुर ग्रामीण ऊं राव राजेन्द्र सिंह अर** जयपुर ऊं मंजू शर्मा नाम पाना दाखिल कीना । मुख्यमंत्री भजन लाल शर्मा जयपुर, अलवर अर करौली मांय भाजपा रा उम्मीदवारां कानी ऊं पर्चा दाखिल कर्यां पाछे जनसभा ने संबोधित कीना । वे कांग्रेस माथे परिवारवाद चलावण रो आरोप माण्ड्यो ।

-----

भाजपा रा प्रदेश अध्यक्ष सी.पी. जोशी बीकानेर अर श्रीगंगानगर मांय जनसभावां कीनी। उप मुख्यमंत्री दिया कुमारी ई बीकानेर मांय जनसभा ने सम्बोधित कीनी। जयपुर सीट ऊं पर्चो दाखिल कर्यां पाछे कांग्रेस रा उम्मीदवार प्रताप सिंह खाचरियावास कह्यो के पार्टी सुनील शर्मा रो टिकट नी काटयो बल्कि वे खुद चुनाव नी लडबा री मंशा जाहिर कीनी ही। राष्ट्रीय लोक तांत्रिक पार्टी—आरएलपी रा उम्मीदवार हनुमान बेनीवाल नागौर लोकसभा सीट ऊं उम्मीदवारी रो पर्चो दाखिल कीनो। वे खबरनवीसां सागे बातचीत करता थकां जनता रो समर्थन मिलण रो भरोसो जतायो। दूजी कानी कुछ दिन पैली ई कांग्रेस पार्टी मांय पाछा आया नरेश मीणा आज दौसा लोकसभा हलका ऊं निदर्लीय उम्मीदवार रा तौर ऊं पर्चो दाखिल कर दीनो। भरतपुर मांय भारतीय जनता पार्टी रा उम्मीदवार रामस्वरूप कोली नामांकन रैली निकाली। दूजी कानी कांग्रेस री उम्मीदवार संजना जाटव ई जुलूस रा रूप मांय पर्चो दाखिल करण सारू जिला कलेक्ट्रेट पूग र पर्चो दाखिल कीनो।

चूरू ऊं कांग्रेस रा उम्मीदवार राहुल कस्वां ई आज नामपानो दाखिल कीनो। ई मौके राख्यी ज्यी सभा मांय राज्य रा पैली वाळा मुख्यमंत्री अशोक गहलोत वां रा राज मांय जनता रा भला सारू करायी ज्या कामां रो जिक् कीनो। गहलोत कह्यो के वां रा राज मांय प्रदेश री जनता रा भला सारू बणायी ज्यी योजनावां सरीखी योजनावां देश मांय कठे ई नी है।

-----

आज ताई भरी ज्या पर्चा री काल जांच करी जावेला। उम्मीदवार 30 मार्च ताई नाम पाछा ले सकेला। लोकसभा चुनाव रा पहला दौर रा तैत प्रदेश मांय जयपुर समेत 12 हलकां मांय 19 अप्रैल ने वोट पड़ेला।

000

राज्य मांय लोकसभा चुनाव रा दूजा दौर री चुनाव प्रक्रिया री अधिसूचना काल जारी करी जावेला। ई दौर रा चुनाव सारू 4 अप्रैल ताई नामपाना दाखिल कर्या जा सकेला। पर्चा री जांच 5 अप्रैल ने करी जावेला अर 8 अप्रैल ताई नाम पाछा लिया जा सकेला। ई दौर मांय चुनाव सारू 26 अप्रैल ने वोट पड़ेला।

000

राज्य मांय लोकसभा चुनाव रा पहला दौर रा तैत नामपाना दाखिल करण रो काम पूरो व्हेवण सागे ई उम्मीदवार प्रचार सरू कर दीनो है। भारतीय जनता पार्टी 40 स्टार प्रचारकां री लिस्ट जारी कीनी है, जिण मांय प्रधानमंत्री नरेंद्र मोदी, पार्टी रा राष्ट्रीय अध्यक्ष जे.पी. नड्डा, पार्टी रा आला नेता राजनाथ सिंह, अमित शाह, नितिन गडकरी, योगी आदित्यनाथ, भजनलाल शर्मा, ओम बिरला, सी.पी. जोशी, वसुंधरा राजे अर गजेंद्र सिंह शेखावत रा नाम शामिल है। कैलाश चौधरी, केशव प्रसाद मौर्य, देवेन्द्र फडणवीस, अलका सिंह गुर्जर, डॉ. किरोडीलाल मीणा, घनश्याम तिवारी, डॉ.सतीश पूनिया, राजेंद्र गहलोत, दिया कुमारी, डॉ.प्रेमचंद बैरवा, राज्यवर्धन सिंह राठौड़ अर बा बा बालकनाथ ई पार्टी रा स्टार प्रचारक व्हेला।

0000

लोकसभा चुनाव री तैयारियां रा तैत आज डूंगरपुर मांय एफ.एस.टी. अर एस.एस.टी. टीमां ने सिखावण दीरीजी। ई रा तैत वां ने चुनाव आयोग री ओर ऊं बणायी ज्या नियमां री जाणकारी दीरीजी। जयपुर अर चित्तौडगढ मांय चुनाव आदर्श आचार संहिता री पालना तैय करावण समेत लोकतंत्र रा महापर्व मांय मीडिया री भूमिका रा बारा मांय मीडिया रा नुमाइन्दां री मीटिंग राख्यी ज्यी। भरतपुर जिला रा नदबई मांय लोकसभा चुनाव रे दौरान निपख अर बिना डर्यां वोट देवण री अपील करता थकां पुलिस अर सी.आर.पी.एफ. री टीम पलेग मार्च कीनो। करौली-धौलपुर लोकसभा हलका रा व्यय पर्यवेक्षक तरुण कुमार अर सामान्य पर्यवेक्षक डॉक्टर एम हरि जवाहर लाल एमसीएमसी अर मीडिया प्रकोष्ठ रो दौरा कीनो।

00000

प्रदेश मांय लोकसभा चुनाव मांय मतदातावां री बत्ती ऊं बत्ती भागीदारी तैय करण सारू न्यारा-न्यारा जतन कर्या जा रह्या है। अजमेर मांय स्वीप गतिविधियां माथे आधारित साप्ताहिक अजमेर स्वीप एक्सप्रेस रा प्रवेशांक रो आज विमोचन करी ज्यो। जिला निर्वाचन अधिकारी डॉ. भारती दीक्षित बतायो के अजमेर संसदीय हलका मांय वोट देवण बाबत् जाग जगावण सारू सप्ताह मांय एक दफा ओ बुलेटिन छापण रो नवाचार करी ज्यो है। टोंक मांय आज रैली अर कलश यात्रा निकाळी ज्यी जिण ने जिला निर्वाचन अधिकारी डॉ. सौम्या झा हरी झंडी बता र रवाना कीनी। रैली मांय अहलकार, कर्मचारी, नुवा मतदाता, आंगनबाड़ी कार्यकर्ता, सहायिकां, ग्राम साथिनां, स्कूली बच्चां अर स्काउट गाइड सिरकत कीनी। जालौर मांय आज जनता रे आवण-जावण री ठौड़ां वोट देवण बाबत् जाग जगावण ऊं जुड्या पोस्टर, बैनर अर होर्डिंग्स लगायी ज्या। जिला मांय बिजली रा बिल माथे ई वोट जरूर देवण री अपील छापी ज्यी है। झालावाड़ जिला रा सुनेल ब्लॉक मांय ओड़ियाखेड़ी, फतेहगढ़, सेमला अर माथनिया ग्राम पंचायतां मांय मनरेगा रा तैत चाल रह्या कमठाणा माथे मजुरा ने वोट जरूर देवण री सौगंध दिरायी ज्यी। सर्वाईमाधोपुर मांय महिला अर बाल विकास विभाग री ओर ऊं जागरूकता रैली निकाळी ज्यी।

000

लोकसभा चुनाव मांय वोट देवण बाबत् जाग जगावण सारू आकाशवाणी समाचार जयपुर री ओर ऊं संदेश श्रृंखला चलायी जा रही है। आप संदेश रिकॉर्ड कर र या टाइप कर र म्हाणा व्हॉट्सअप नम्बर 94140-52368 माथे भेज सको हो। चुणी ज्या संदेश म्हाणा न्यारा-न्यारा समाचार बुलेटिन मांय भेळा कर्या जावेला। बाडमेर जिला मांय चौहटन रा चेतनराम विरडा मांड्योड़ा संदेश मांय सगळा मतदातावां ऊं वोट जरूर देवण री अपील कीनी। वे माण्ड्यो के म्हाणो देश लोकतांत्रिक देश है अर वोट देवणो म्हां सगळां री जिम्मेदारी है, कांकि हर एक वोट घणो खास व्हे है। अनूपगढ़ जिला रा एक दृष्टि बाधित श्रोता ई उमाव सागे वां रो संदेश भेज्यो।

.....

फौजी कमांडरां रो सम्मेलण काल नई दिल्ली मांय हाईब्रिड तरीका ऊं सरू व्हेला। सम्मेलन रे दौरान रक्षामंत्री राजनाथ सिंह संबोधन देवेला। वे दो अप्रैल ने फौज रा आला अहलकारां सागे बातचीत ई करेला। सम्मेलन रा पहला दिन सेना प्रमुख जनरल मनोज पाण्डेय सम्मेलन मांय वर्चुअल तरीका ऊं सिरकत करण वाळा फौजी कमांडरां सागे बातचीत करेला।

000

गुजरात रा गांधीनगर मांय व्ही एसबीआई ग्रीन मैराथन मांय सोना रो तमगो जीतण वाळा रोहित बंशीवाल अर गणपत सिंह चूंडावत रो आज बूंदी रा जिला कलेक्टर अक्षय गोदारा मान कीनो। रोहित बंशीवाल 21 किलोमीटर हाफ मैराथन 1 घंटा 5 मिनट मांय पूरी कर र सोना रो तमगो जीत्यो जद के गणपत सिंह चूंडावत 10 किमी दौड़ 30 मिनट मांय पूरी कर र सोना रा तमगो जीत्यो।

000

राज्य रा आतूणी हलका मांय तेज गर्मी पडबा लागी है। मौसम विभाग रे मुजब ई हलका मांय दिन री बगत तापमान सामान्य ऊं 3 ऊं 5 डिग्री सेल्सियस ऊंचो दर्ज कर्यो जा रह्यो है। आज जैसलमेर अर फलौदी मांय जोरदार तावड़ो पड्यो। फलौदी मांय सब ऊं बत्तो 41 दशमलव 2 डिग्री सैल्सियस तापमान दर्ज करी ज्यो। दूजी कानी चूरु अर हनुमानगढ़ समेत राज्य रा उतराद हलकां मांय कठे-कठे हल्की बिरखा या छांटो-छिडको व्ह्यो। मौसम विभाग रे मुजब 29 अर 30 मार्च ने एक नया पश्चिमी विक्षोभ रा असर ऊं जोधपुर, बीकानेर, जयपुर अर भरतपुर संभाग मांय कठे-कठे औचक ई तेज बायरो बाजण अर हल्की बिरखा व्हेवण रा आसार है।

000